

Abendualdiko 1. Igandea (B)

LEHENENGO IRAKURGAIA

Ai zerua urratu eta jaitsiko bazina!

Isaías liburutik 63, 16b-17. 19b; 64, 2b-7

Zeu zara, Jauna, gure aita,
«Gure askatzaile»
duzu izena betidanik.

Zergatik utzi diguzu
zure bideetatik aldentzen,
zuri begirunerik ez izateraino
gure bihotzak gogortzen?

Itzul zakizkigu,
zeure zerbitzariongatik,
zeure oinordetzat aukeratu dituzun
leinuongatik.

Ai zerua urratu eta jaitsiko bazina!

Mendiek dar-dar egingo lukete
zure aurrean.

Zu jaitsi,
eta mendiek zure aurrean dar-dar.

Ez da inoiz entzun,
ez da inoiz aditu, ez ikusi,
zuk ez beste jainkoren batek
berarengan itxaro duenaren alde
horrelakoak egin dituenik.

Bere poza zuzen jokatzeari
jartzen duenari,
zure nahia beti gogoan duenari,
bidera ateratzen zatzaizkio.

Bai, haserre zaude
bekatu egin dugulako,

antzinatik bide-galdurik
ibili garelako.

Kutsaturik gaude guztiok,
gure egintzarik onenak ere
zapi zikinen antzeko;
orbela bezala gaude iharturik
eta haizeak bezala garamatzate
geure erruek.

Inork ez dizu dei egiten,
ezta zuri atxikitzen saiatzen ere,
zeure aurpegia ezkutatu baitiguzu,
eta geure erruetan murgilduta utzi.

Baina zu, Jauna, gure aita zara;
gu buztina, eta zu buztinlaria:
zeuk eginak gaituzu guztiok!

Jaunak esana.

SALMOA

Salmoa 79, 2ac y 3b. 15-16. 18-19 (4)

R.

*Oi Jainko, eraberri gaitzazu,
erakutsi guri aurpegi argia, salba gaitezen!*

Entzun, Israelen artzain.

Hegaldun izakien arteko tronuan zauden hori,
ager zakizkie distiraz
Suspertu zeure ahalmena eta zatozkigu salbatzera! **R.**

Jainko ahalguztiduna, itzuli, arren!

Begira zerutik, ikus!

Hartzazu zeure mahastiaren ardura,
zaindu zeure eskuz landatu duzuna. **R.**

Zure eskuak babes beza zuk aukeraturiko erregea,

zeure indarraz jantzi duzun gizasemea.

Ez gara zuregandik inoiz aldenduko;
bizia emango diguzu eta guk zuri dei egingo. **R.**

BIGARREN IRAKURGAIA

Jesu Kristo gure Jauna noiz agertuko den zain zaudeten bitartean.

San Paulo Apostoluak Korintoarrei egindako lehenengo gutunetik 1,3-9

Senideok: Jainko gure Aitak eta Jesu Kristo Jaunak eman biezazkizuite grazia eta bakea.

Eskerrak ematen dizkiot etengabe neure Jainkoari zuengatik, Jesu Kristoren bidez agertu dizuen onginahiagatik.

Izan ere, Kristoren bitartez, gauza guztietan aberats egin zaituzte, bai hitz egiteko eta bai ezagutzeko. Kristori buruz egiten dugun aitormena zuen artean sendo finkatu denez, ez da zuek ez duzuen dohainik, Jesu Kristo gure Jauna noiz agertuko den zain zaudeten bitartean.

Berak sendo iraunaraziko zaituzte azkenerraino, inork zuen aurka zeresanik izan ez dezan Jesu Kristo gure Jauna etorriko den egunean.

Leiala da Jainkoa, eta berak deitu zaituzte bere Seme Jesu Kristo gure Jaunarekin elkaturik bizitzera.

Jaunak esana.

Aleluia Sal 84,8

Aleluia, aleluia.

Egiaz, Jaunak euria emango du,
eta gure lurak uzta ekarriko. Aleluia.

EBANJELIOA

Egon zain, beraz, ez baitakizue etxeko jauna noiz etorriko den.

+ Jesu Kristoren Ebanjelioa San Markosen liburutik 13,33-37

Egun haietan, Jesusek bere ikasleei esan zioten: «Kontuz, bada! Egon erne! Ez baitakizue ordua noiz den.

Gizon bat urrutira doanean bezala da: morroien gain uzten du bere etxea, bakoitzari bere lana emanaz, eta zain egoteko agintzen dio atezainari.

«Egon zain, beraz, ez baitakizue etxeko jauna noiz etorriko den: arratsean, gauerdian, oilarrak jotzean ala goizean. Ez zaitzatela ustekabeen etorri eta lotan aurki. Zuei esaten dizuedan hau, denentzat esaten dut: Egon zain!»

Jaunak esana.

Blog: <https://homiliaspagola.blogspot.com/>